



Павелнің коринфтегілерге ікінші пічии

Павелнің алындағы пічиінде Коринфтегі Христос тигірибін алдап, үгредіп пасханы салтарлар пирген. Чазых иткен кізілернің илеездезі пыросынып, Павелнең чаразар оңдай тілееннер. Че ол тигірибде кизек чон Павелні улуғлапчатханның тоғырланарын тохтаатпинчатхан. Аннаңар Павел Македон чирінде полчатхан туста, Коринфсер пазох чол сығарға тимненчеткенінде, оларға пазох пір пічиин ысхан.

Ол пічік пасхаларының хыринда іди ле иптiг, изерістіре пазылбаан. Хынза, анзына сылтағ Павелнің, пічік пасчатханда, тың өкпеленгенінде полған. Пірее істезігчілер, коринфтегілерге пазылған пу пічік, ікі алай үс тее алынча пічікнең піріктіріліп, соонаң пазылған полар тіп, санапчалар.

Хайзы даа саринаң көрзе, аны үс чардыхха үлестірібізере чарир: 1) Павелнің Коринфтегі тигірибнең чарасханына өрінгені паза илчінің Христосха тоғынғанынанаң пасханы (1-7 пастағлар); 2) Иерусалимдегі чох чуртапчатхан христианнарға пос күзінең пар-чоғынаң полызарданаң коринфтегілерні үгредіп чоохтааны (8-9 пастағлар); 3) поэна туза аларға идіп, Чахсы Хабарға үгретче тіп, Павелні пыролапчатхан чой үгретчілернің чооғын исчеткеннері үчүн, коринфтегілерге хомзынызын читірче.

Алғас

1 Худайның көннiнче Христос Иисустың илчізі^с полчатхан Павел паза Тимофей харындас Коринфтегі Худай тигірибiне^с паза тиксі Ахай чирінде чуртапчатхан ах-арың^с кізілерге чолабит ысчабыс. ²Худай Пабабыстаң паза Хан-пигібіс^с Иисус Христостаң паарсас паза амыр хоных сіреге ползын.

Павел Худайны алғыстапча

³Худай, Хан-пигібіс Иисус Христостың Пабазы, сабланзын. Ол хайдағ даа айағның Пабазы паза ноо даа часхарыстың Худайы полча. ⁴Ол пісті ноо даа сидіксіністерде часхарча. Анна-нар піс тее сидікке урунған кізілерні часхар полчабыс. Піс оларны, Худай пісті часхарчатхан чіли, часхарчабыс. ⁵Христостың чобағларында ханча көп араласчабыс, анчоһ көп Христостың пастыра часхарыс алчабыс. ⁶⁻⁷Піс чобалчатсабыс, тізең, сірерні часхарынзыннар паза арачыланзыннар тіп чобалчабыс. Ол арачыланыс піс тее көрчеткен ирееленістерні сыдас парары хоостыра пирілче. Сірернің прай нимені сыдас парыбызарларыңа тың ізенчебіс. Піс часхарынчатсабыс, сірерні дее часхарынзыннар паза арачыланзыннар тіп часхарынчабыс. Чобағларыбыста даа, часхарыныстарыбыста даа сірер араласчатханнарыңны пілчебіс нооза.

⁸Ана аннаһар, харындастар, Асий чирінде^c піске урунған ирееленістерібістенеһар сірерні пілбин халбазыннар тіп сағынчабыс. Ол сині чоһ аар, сыдас полбас ирееленістер полғаннаһар, піс тіріг дее халарыбысха ізенминчеткебіс. ⁹Посха нимес, че өлімнең тірілдірчеткен Худайға ла ізенеһар үчүн, піс поэыбысты өлімге чарғылат салған кізілер тіп сағынғабыс. ¹⁰Худай пісті хырыбыста чөрген өлімнең ал халған, ал халча, соонаң даа ал халчадар тіп ізенчебіс. ¹¹Сірер, пазырып, піске матап полысчазар нооза. Худай, көп кізінің пістің үчүн пазырғанын истіп, пісті ал халған. Аның үчүн көп кізі Худайны алғыстаан.

Павелнің пөгіннері алысчалар

¹²Мына нимее поғдархапчабыс паза арығ сағыснаң киречілепчебіс: чоһ аразында, улам сірернің араһарда, полған туста, прай киректерде көні паза азых көннің тудынғабыс. Піс, кізі хыйғазынаң устанмин, Худайның паарсазына ізенгебіс. ¹³Сірерге хығырып піл полар ла нимені пасчабыс. Мыны читіре піл поларларыңа ізенчем. ¹⁴Амды сірер ханча-да онарчазар: Хан-пигібіс Иисус Христос килер күнде піс сірернің махтааһар поларбыс, сірер, тізең, – пістің. ¹⁵Анзын ікінчелебин, сірерге ікі хати көп туза идерім үчүн, сірерзер хати килерге иткем. ¹⁶Македон чирінер париріп, сірерзер кірерге пөгінчеткем. Аһаң, Македон чирінең сығып, пазох сірерзер парарға итчеткем. Сірер, тізең, міні

Иудей чирінзер^с үдезібізерчіксер. ¹⁷Иди пөгінгенде, мин ниик сағыстығ полбаам нооза. Кізі сағызы хоостыра даа идер чоғылбын. Пірде «йа, йа», анаң «чох, чох» тіп чөрбинөкчем. ¹⁸Худай мағаа киречі: сіерге чоохтаан чооғыбыста пірде «йа», пірде «чох» полбаабыс. ¹⁹Миннең, Силуаннаң паза Тимофейдең сіерде чарлалған Худай Оолғы Иисус Христос пір саңайға «йа» паза «чох» полбаан. Анда «йа» ла полған. ²⁰Худайның прай молчағлары, Христоста толдырыл парып, «йа» паза «аминь^с» пол парғаннар. Анзы Худай пістің пастыра саблан парар үчүн полған. ²¹Худай сіернең пістің Христосха киртінізібісті тыытча. Ол пісті, Позының Худын пирип, таңмалапча. ²²Иди Ол, пісті таныхтап, Позының Худын чүректерібіске пирип, полар тусха ізеніс пирген.

²³Худай Позы киречі, Ол чүреемдегізін пілче. Мин, сіерге айап, пу тусха теере Коринфсер килбеем нооза. ²⁴Анзы киртінізінернең устапчатханыбысты таныхтабинча. Чох, сіерні өрінзіннер тіп, сіернең хада тоғынчабыс. Киртіністерің пик нооза.

2 Ол ондайнаң, мин сіерні пазох хомзындырарға тіп килерге сағынминчам. ²Сіер мині өріндіерге кирексер. Аннаңар, мин сіерні хомзындырчатсам, мині өріндірчең кізі халар ба? Мин хомзындыр салған кізілер ле халар нооза. ³Мин мыны ноғадаңар пасчам? Сіерзер читсем, мині өріндіерге кирек кізілернің үчүн хомзынарым килбинче. Минің өрінізім сіерге дее өрініс полчатханын пір дее ікінчілебинчем нооза. ⁴Улуғ чобаға пастырып, чүреем ағыриина хыстырып, харах чазым төгіп ала, сіерге пасханымда, сіерні хомзындырарға итпеем. Сіерге синінең артых хынызымны сіерні пілзіннер тіп сағынғам.

Пыросынғанның пырозын тастирдаңар

⁵Сіернің піреелерің мині хомзындырчатса, мині ле нимес, сіерні прайзыңарны даа хомзындырча. Пу хоза чоох нимес. ⁶Сіернің көбізі аны хатығлааны ағаа читкіче пол парды нимес пе? ⁷Амды сіер, аның пырозын тастап, часхар салзар, чахсы полар. Пичелге уғаа тың пастыр салып, саңай сағыныбыспазын. ⁸Аннаңар ағаа хынызыңарны читір пириңер тіп сурынчам. ⁹Мин тігі пічиимні, прай нимеде чооғымны исчерер бе тіп піліп алар үчүн, сыныхтап пасхам нооза. ¹⁰Сіер пырозын тастаан кізее мин дее пырозын тастапчам. Мин дее пырозын тастапчатсам,

сірернің үчүн Христостың адынаң аны итчем. ¹¹Сайтан^с пісті алаахтырып албас үчүн, іди иткем. Піс аның хара сағыстарын пілчебіс нооза.

Павелнің Трoадада сағысха түскені

¹² Мин, Христостанар Чахсы Хабарға үгредерге Трoадазар килгенімде, Хан-пигнің чол ас пиргенін көр салғам. ¹³Че Тит харындазымны анда таппин, сағыссырап сыххам. Аннаңар, андағы кізілернең анымчохтазыбызып, Македон чирінзер парыбысхам.

Христоста пайрамнааны

¹⁴Че Худайға алғыс! Піс Христоснаң хада полчатсабыс, Худай піске хачан даа чиңіс пайрамнирын пирче. Ол Христостанар пілісті, тадылығ чысты чіли, пістің пастыра прай чирде таратча. ¹⁵Піс ыстапчатхан тайығның тадылығ чызы осхаспыс. Ол тайығның^с Христос Худайға салча нооза. Ол тайығның чызы арачыланчатханнарға даа, өлімнің чолынча парчатханнарға даа сабылча. ¹⁶Өлімнің чолынча парчатханнарға ол өдірчеткен чабал чыс полча. Арачыланыс чолынча парчатханнарға ол чуртас пирчеткен тадылығ чыс. Кем анзын ит полар? ¹⁷Илееде кізі Худайның сөзін парыс алар үчүн таратча. Піс олар чіли итпинчебіс. Худайның алнында көйтіктенмин тудынып, чоохтапчабыс. Піс Христостың нымысчыларыбыс нооза.

Наа молчағның тоғынчыларынаңар

3 Нөös піс сірернең хатап танызарға кирекпіс? Нөös, піреелеріне чіли, піске сірерзер алай сірердең киречілестіг пічік кирек? ²Сірер пістің чүреебісте пазылған, прайзы пілчеткен паза хығырчатхан пічиибіссер нооза. ³Сірер постарың Христостың пічии полчатханнарыңны көзітчезер. Піс сірернің араңарда тоғынғанда пу пічікті пас салғабыс. Ол черниланаң нимес, че тіріг Худайның Худынаң, таста нимес, че сабылчатхан чүреебісте пазыл парған.

⁴Піс Христосха киртін парғабыс. Аннаңар Худайның алнында сірерденер іди чоохтанарға тідінчебіс. ⁵Піс поэзыбыстың күзібіснен пірее нима ит поларыбыстанар чоохтабинчабыс. Пістің прай күзібіс Худайдан полча. ⁶Ол піске Наа Молчағның^с нымысчылары поларға ондай пирген. Піс холнаң пазылған чахыға

нимес, че Худайның Худына^с нымысчы полчабыс. Холнаң пасхан чахығлар өлімге ағылчалар, Худай Худы, тізең, тірілдірче.

⁷Моисей Чахий^с таста киртілген полған. Ол пирілеткенде, Худайның сабланызы^с азыл парған. Моисейнің^с сырайы тың чараан. Аннаңар Израиль чоны ағаа удур көр полбаан. Че ол иртісчеткен чарых полған. Өлімге ағылчатхан Чахығның чарыпчатхан сабланызы андағ полчатса, ⁸Худай Худының тоғынғаны, тізең, аннаңох артых сабланыс полбас па? ⁹Чарғылаттырарына ағылчатхан чахығ андағ сабланыснаң чарыпчатса, ахтаныс пирчеткен тоғыс хай син артых сабланыснаң чарир. ¹⁰Піди чоохтирға чарир: артых сабланыс килгенненер, алында саблығ полғаны позының сабланызын чідір салған. ¹¹Иртісчеткен молчағ сабланыстығ полчатханда, иртіспинчеткен молчағ улам сабланыстығ полбас па?

¹²Пістің андағ ізеніс парда, чалтанмас тідініснең тудынчабыс. ¹³Піс Моисей чіли итпинчебіс. Израиль ооллары сабланыстығ чариинның иртісчеткенін көр салбазыннар тіп, Моисей сырайын иснең пүргебіскен. ¹⁴Оларның сағыстары ай парған полған. Пу тусха теере олар Пурунғы Молчағны хығырчатсалар, оларның сағыстары олох иснең пүргелік. Христос ла ол исті хыйа ал полар нооза. ¹⁵Амға теере олар Моисей Чахийин хығырчатсалар, чүректері иснең пүргелік. ¹⁶Че хачан олар Хан-пигзер айланчатсалар, андада ол ис хыйа аылча. ¹⁷Піс чоохтапчатхан Хан-пиг Худай Худы полча. Худай Худы полчатхан чирде, тізең, кізілерге пос поларға ондай пирілче. ¹⁸Піс, тізең, Хан-пигнің сабланызын пүргелбеен сырайыбыста, көріндесте чіли, көзітчебіс. Хан-пигнің Худы піске сабланыс пирче. Ол сабланыс пісті, Хан-пиге төөй идіп, алыстырча паза улуғдаң улуғ сабланысха ағылча.

Той ідістердегі хайхастығ ис-най

4 Аннаңар Худай, піске айап, пу тоғысты пирген, піс, тізең, көннібіс түзірбинчебіс. ²Че піс туйух, уйадыстығ киректерні хыйа итчебіс паза көйтікке салынминчабыс. Піс, Худай сөстерін хыйыстырбин, сынны азып, постарыбысты Худайның алында ноо даа кізінің чарғызына сығарчабыс. ³Піс чарлапчатхан Хабар піреезіне иснең чабых осхас полза, ол өлім чолынча парчатханнарға чабых. ⁴Ол кізілер киртінминчелер. Пу чабал тустың худайы полчатхан сайтан оларның сағыстарын харасхыда

тутча. Ол Христостың сабланызынанар чарлапчатхан Чахсы Хабарның чариин көрерге пирбинче. Че Христос Худайның омазы полча нооза. ⁵Піс, тізең, позыбыстанар нимес, Иисус Христос Хан-пигібіс полчатханнанар үгретчебіс. Иисус піске иткен ни-менің үчүн, піс сірерге хул полыбысхабыс. ⁶«Харасхыда чарых ползын» тіп, Худай пістің чүректерібісті чарыдыбысхан. Иди Ол Иисус Христостың сырайында чарыпчатхан Худайның сабланызын пілерге пирген.

⁷Пістің иді-ханыбыс той ідіс осхас. Ол ідісте піс хайхастығ ис-пайны хайраллапчабыс. Анзы пу сабланыстығ күзібіс пістең полбинчатханын, че Худайдаң килчеткенін прайзына көріндірер үчүн иділче. ⁸Піс прай чирдең хыстырчабыс, че пастырбаабыс. Сидік ондайға кір тее парған ползабыс, көннібіс түспинче. ⁹Піс сүрдірчебіс, че Худай пісті тастабинча. Азахтаң түзіре саптырзабыс таа, чох иттірбеебіс. ¹⁰Позыбыста Иисусти осхас тірілер күзібіс полар үчүн, сыбыра ирееленіп, піс Иисус өлген чілі өлчебіс. ¹¹Піс Иисустың үчүн чуртазыбыста өлімге тоғасчабыс. Анзы пістің өлер ит-ханыбыста Иисустың чуртазы көрінері үчүн полча. ¹²Аннаңар піс өлімнің, че сірер, тізең, чуртастың холындазар. ¹³Худай Пічиинде^c «мин киртін парғам, аннаңар теем*» тіп пазылған. Пісте дее ол киртініс пар. Аннаңар піс тее киртінчебіс паза чоохтапчабыс. ¹⁴Хан-пигібіс Иисусты тірілдірген Худай Иисустың пастыра пісті дее тірілдірерін пілчебіс. Андада Ол пісті сірернең хада Позының алнында турғыс салар. ¹⁵Прай пу ниме сірерге туза. Худайның паарсазы көптең көп кізее читче. Худай сабланың үчүн, олар Аны улам көп алғыстапчалар.

Чирдегі өлімнің чуртас паза сабланыстығ мөгі чуртас

¹⁶Аннаңар піс көңнібісті түзірбинчебіс. Пістің иді-ханыбыстың күзі хорапчатса даа, худыбыс, тізең, күннің сай наачылалча. ¹⁷⁻¹⁸Піс көрінчеткен нимее көрбинчебіс, көрінминчеткенге көрчебіс. Аннаңар оой, иртісчең ирееленістерібіс илбек паза мөгі сабланыс төрїтчелер. Харахха көрінчеткен ни-менің тузы хысха, харахха көрінмес ниме, тізең, мөгі нооза.

* 4:13 Көр: Пурунғы Молчағдағы «Ырлар» (Псалтирь) кинде 116:10.

5 Пу чирде чуртапчатхан пістің ит-ханыбыс отах осхас. Ол изел парза, Худай піске хол пүдірбеен мөгі иб-чурт пирер. Ол пістің тигірдегі ит-ханыбыс полар*. ² Аннаңар, тигірдегі иб-чуртыбысха кіріп аларға сағынып, чидікпинчебіс нооза. ³ Ол ондайнаң тигірдегі ит-ханыбысха кіріп аларбыс, чалаас хут полып, хал парбаспыс. ⁴ Пу чирдегі отахта чуртап, піс ирееленіп паза позып аларға чидікпин чөрчебіс. Анзы өлерге паза пу чирдегі ит-ханыбыс чох халарға нимес, че тигірдегі ит-ханыбысха кірерге хынғаны полча. Хачан ол ниме пол парза, чуртас өлімнің нимені чох ит салар. ⁵ Анзы полар үчүн, Худай пісті чайап салған паза, молчаан толдыраын киречілеп, Позының Худын піске пирген.

⁶ Ол ондайнаң піс сыбыра ізестіг чөрчебіс. Піс пілчебіс, пу иді-ханыбыста чуртап, Хан-пигдең ырахпыс. ⁷ Че піске харах көрчеткені нимес, киртініс өөні полча нооза. ⁸ Анзын пілчеткенде, ізестіг чөрчебіс паза, иді-ханыбыс полчатхан отахтаң сых парып, тигірдегі иббісте Хан-пигнең хада орнығарыбыс килче. ⁹ Аннаңар, хайда даа ползабыс, пу чирдегі алай тигірдегі ит-ханыбыста пістің Хан-пигнің көңніне кірерібіс килче. ¹⁰ Піске прайзыбысха Христостың чарғызы алнында турарға килізер. Андада пу чирде ит-ханыбыста чуртаан туста иткен чахсы ба, хомай ба киректерібіс үчүн полғаныбыс ла нандырығ тударбыс.

Христостың пастыра Худайнаң чарасханы

¹¹ Худайдаң хайди хорығарын піліп, піс анзына кізілерні үгрет парчабыс. Худай пістің сағыстарыбысты паза пөгіннерібісті пілче. Сірер дее оларны пілібөкчезер тіп ізенчем. ¹² Піс позыбысты махтирға итчебіс пе? Чох, че піснең поғдархирға сірерге сылтағ пирчебіс. Андада сірер чүректегізінең нимес, че тастындағы көрімінең махтанысчатхан кізілерге нандырығ пир поларзар. ¹³ Піс пасхаçыл полчатсабыс, анзын Худайға хынчатханыбыстанар итчебіс. Пос сағызында чөрчетсебіс, анзын сірернің үчүн итчебіс. ¹⁴ Христостың хынызына хаптырт салған кізі піди сағынча: Христос прайзының үчүн ол парғаннаңар, прайзы Аннаң хада ол парған. ¹⁵ Ол прайзының үчүн ол парған. Аннаңар чуртапчатхан

* 5:1 «Ол пістің тигірдегі ит-ханыбыс полар» сөстер грек пічіктерінде чоғыл, піс оларны пу стихтарның сағызын чарыдар үчүн хосхабыс.

кізілер постарына нимес, че оларның үчүн өліп, тірілген Христосха чуртирға киректер.

¹⁶ Писке кізілерні, көрчеткен нимее төстеніп, чарғылирға чарабас. Хачан-да Христостанар, кізіденер ле чили, сағынған полфабыс. Ам, тізең, пасха сағынарға кирекпіс. ¹⁷ Ам, тізең, Христоснаң пір полыбысхан кізі наа кізі пол парған. Иргі чуртас ирт парған, прай ние наа пол парған. ¹⁸ Прай ол нимені Худай иткен. Ол Иисус Христостың пастыра пісті Позынаң чарастыр салған паза писке пасхаларын чарастыраға пөгін пирген. ¹⁹ Худай кізілерні чазыхтары^c үчүн пыролабаан. Ол Христостың пастыра тилекейні Позынаң чарастырыбысхан паза писке ол чарастанар сөсті тарадарға пир салған.

²⁰ Ол ондайнаң піс Христостың адынаң чоохтапчабыс. Пістің пастыра Худай Позы чоохтанчатханға килісче. Аннаңар Христостың адынаң алданчабыс сірерге: Худайнаң чарас салыңар. ²¹ Чазығы чох Христосты Худай пістің чазыхтарыбыс үчүн хатыглап салған. Аннаңар піс, Христосха киргінчетсебіс, Худайның алнында арығ көннiлiг полчабыс.

6 Піс, тізең, Худайнаң хада тоғынчатханнар, Ол пирген паарсасты сірерні тик ле алған полбазыннар тіп, сірерге алданчабыс. ² Чоохталған нооза: «паарсах поларға тус чит килгенде, Мин сині истіп салғам. Сині арачылир күн чит килгенде, Мин сағаа полыс пиргем». Мына Худайның паарсазын алчаң тус, мына арачыланыс күні.

³ Тоғызыбысха чарадынмаан кізі чох ползын тіп сағынчабыс. Аннаңар пістенер пірдеезі хомай тібезін тіп чуртирға күстенчебіс. ⁴ Прай ниеме тудынчатханыбыс хоостыра Худай нымысчылары полчатханыбысты көзітчебіс. Хыйаланыстарда, хызылыста, сидік ондайларда піс илбек тыстаныс көзітчебіс. ⁵ Пісті сохханнар, пиктегде тутханнар, өмелееннер. Піс үзе тоғынфабыс, уйғу-чадын пілбин, чиис чох чуртаабыс. ⁶ Че піс хачан даа арығ чүректіг полфабыс, хыйға тудынфабыс, тыстанфабыс паза аллығ көннiлiг полфабыс. Піс хачан даа прай ниеме сыннаң хынып, Худай Худы хоостыра иткебіс. ⁷ Піс сынның сөзіне үгредіп паза Худай күзінең тузаланып чуртаабыс. Киргіністі арачылир паза тарадар киректе арығ чүреебіс писке хуйах паза хылыс полған. ⁸ Піреелері пісті улуғлааннар, пасхалары ниеме салбааннар. Пісті хыйхытапчалар паза махтапчалар. Пісті чой тіп санапчалар,

піс, тізең, сынны чоохтапчабыс. ⁹ Пиреелері пісті нимее салбинчалар, че прайзы пістөнер пілче. Пісті өліге санапчалар, че піс мына, тірігбіс. Піс сохтырчабыс, че өлбинчөбіс. ¹⁰ Пісті хомзындырчалар, че піс сыбыра өрчiлiгбіс, піс чохпыс, че көп кізіні пайытчабыс, пістің пір дее ниме чоғыл, че піс сынында прай нименің ээзі полчабыс.

¹¹ Коринфтегілер! Піс сірернең көні чоохтасхабыс. Піс сірерге чүреебісті аллығ асхабыс. ¹² Сірерге пісте тар нимес, че сірернің чүректерiң тар. ¹³ Мин сірерге палаларыма чiли чоохтапчам: сірер дее чүректерiннi азынар.

Чарыхнаң харасхы пірік полбастар

¹⁴ Киртініс чохтарнаң пір көлігде чөрбөнер. Арығ чүректігнi^c паза чабал кізіні піріктiрчөткөн пірее ниме пар ба? Пір орында пір саңай чарых паза харасхы полча ба? ¹⁵ Христоснаң Велиар* піліс поларлар ба? Киртіністіг кізіні киртініс чохнаң пірее ниме піріктiрчө ни? ¹⁶ Худай храмында обаалар турғызар ба? Піс, тізең, тіріг Худайның храмы полчабыс. Худай піди теен нооза: «Мин оларның аразында Позыма тура пүдіріп аларбын паза оларнаң хада чуртирбын. Оларның Худайы поларбын, олар, тізең, Минің чоным поларлар». ¹⁷ Аннаң андар Хан Худай^c тіпче: «Олардаң чарылып, парыбызынар. Кірліг нимее теңмеңер, андада Мин сірернi Позымзар аларбын. ¹⁸ Мин сірернiң пабаларың улыбызарбын. Сірер Минің оолларым паза хыстарым улыбызарзар. Иди Прай нимедөң күстіг Хан Худай тіпче».

7 Ол ондайнаң, хынғаннарым, андағ сөс пирiл парғанда, ит-ханыбыста паза худыбыста пар чабал нимедөң арығланып алааңар. Ол ондайнаң, Худайдаң хорығып ала, пүкүле ах-арығ улыбызыңар.

Павелнiң өрiнiзi

² Постарыңның чүректерiнде піске орын пирiнер. Піс пiрдөзiн хомзындырбаабыс, пiрдөзiн сайбап салбаабыс, пiрдөзiне чаптанмаабыс. ³ Мин мыны хомайлап тiбiнчөм. Алында даа теен полғам: сірер пістің чүреебістөзер, сірернең хада өлерге дее, чуртирға даа тимдөбіс. ⁴ Мин сірернең көні чоохтас поларыма

* 6:15 Еврей кинделерінде Велиар сайтанның аттарының пірiсi.

ікінчiлебинчем. Сiрернең тың махтанчам! Чобағларыбысха пас-тырзам даа, кӧннiме часхарыс толча, ӧрiнiс чӱреемнең асча.

⁵ Пiс, Македон чирiнзер читкенiбiсте, тынан полбаабыс. Прай саринаң хыстыр килгебiс: тоғыртын пiстi таластарнаң ӧмелеен-нер, iстiбiсте хорыхханыбыс полған. ⁶ Че пазымнығларны час-харчатхан Худай, Титтi пiссер ызыбызып, пiстi часхар салған. ⁷ Пiс Титтiң сiрердең килгенiне ле нимес, че сiрер аның кӧннiн кӧдiр пиргеннерiңнеңер чооғына ӧрiн парғабыс. Тит минi кӧрерлерiң тың килчеткенiн, пiс сiрернең пiлiс полбаанға ачырғанчатханнарыңны паза минi арачылирға тимделерiңнi чоохтап пирген. Анзына мин амды улам ӧрiнчем. ⁸ Аннаңар пiчиимнең сiрернi хомзындыр салғаныма айабинчам. Итсе, айабысхан полғам: кӧрчем нооза пiчиим сiрернiң кӧннiлерiңнi тӱзiр салған. Че анзы тӱрчеге ле полған. ⁹ Ам мин кӧннiлерiңнi тӱзiр салғаныма ӧрiнминчем. Че кӧннiлерiң тӱскенi сiрернiң тудынғаннарыңны алыстыр салғанына ӧрiнчем. Кӧннiлерiң тӱскенi, тiзен, сiрернi Худайзар айландыр салған. Аннаңар пiс сiрерге пiр дее хомай нима итпеебiс. ¹⁰ Кӧннi тӱскенi Худайзар айландырчатса, кiзi хайди даа тудынғанын алыстырар паза арачыланысха килер. Кiзiнiң кӧннi пу чирдегiлерни чiли тӱссе, анзы ӧлiмге ағылча нооза. ¹¹ Кӧрiнер, пу пичеллерiңнiң пастыра Худай нима ит салған: хайдағ кӱстенчiк ит салды сiрернi. Хайдағ пыросыныс, пыролығ кiзее тарығыс, хорығыс, сағыссырас, сiренiс, хатығлас ол сiрердең сығарыбысты. Пу киректе сiрер постарыңны прай саринаң арығ кӧзiт салдыңар. ¹² Ол ондайнаң мин сiрерге чазыхтығ кiзiнi пыролирға алай хыйыхтатхан кiзiнiң кӧннiн кӧдiрерге тiп паспаам. Худай киречi, мин мыны пiс сiрердеңер матап сағыссырапчатханнарыбысты сiрернi пiлзiннер тiп пасхам. ¹³ Аннаңар пiстiң кӧннiбiс кӧдiрiл парған.

Че сiрернiң тудынчатханнарыңны кӧрiп, Тит чӱреен амырадып алған, ӧрiн парған. Пiс, тiзен, аның ӧрiнiзiне улам тың ӧрiнгебiс. ¹⁴ Мин ағаа сiрернi махтааным ӱчӱн, мағаа уйдарға килiспеен. Сiрерге чоохтаан нима дее, Титке сiрернi махтааныбыс таа, прай сынға айлан парды. ¹⁵ Ол, сiрернiң чоох искенiн, аны, улуғлап, хорығып ала удурлаанын сағысха кирiп, сiрернi чӱрекке чағын алча. ¹⁶ Аннаңар сiрер минiң киртiзiме турысханнарыңа ӧрiнчем.

Пос көңнінең сыйых пиргені

8 Сірге, харындастар, Македон чиріндегі тигіриблерге Худайдаң пирілген паарсастанар искірчебіс. ² Олар, көп чобағ көріп, хатығ сынағ ирткен дее ползалар, уғаа өріністіглер. Постары тың хызылчатсалар даа, сыйыхты пар-чох чүрекерінең пирчелер. ³ Мин киречібін, олар пос көңнінең ханча полғанча, поларларынаң артых таа, пирчелер. ⁴ Иудей чиріндегі ах-арыларға хабазарға польпы, пісті постарының сыйыхтарын алып аларға матап сурынғаннар. ⁵ Олар піс ізенген нимені ле пирбееннер, че постарын пурнада Хан-пиге, анаң, Худайның көңні хоостыра, піске пир салғаннар. ⁶ Аннаңар піс Титті, пу чахсы киректі, хайди сірерде пастаан, ідөк тоос салзын тіп сурынғабыс. ⁷ Сірернің прай ниме синінең дее азыра пар: киртініс, иптіг сөс, піліс, күстеніс, піске хыныс. Аннаңар пу даа чахсы кирекке пар-чох күстеріңні салыңар.

⁸ Мин сірге чахығ пирбинчем, че македон кізілернің пользарға күстенчеткеннерінеңер чоохтап, сірернің сын хыныстарыңны сынапчам. ⁹ Хан-пигібіс Иисус Христостың паарсазын пілчезер нооза. Ол Позы, пай полчадып, сірернің үчүн чох-чоос польбысхан. Позы чох-чоос польбысханынаң сірерні пай ит саларға хынған. ¹⁰ Мин сірге мындағ чөп пирчем. Піди итсенер, чахсы полар: пылтыр сірер сыйых пирерінде ле алнында полбаазар, сірер аны пирер көңніңерні прайзынаң пурун көзіткезер. ¹¹ Амды, тізең, пу киректі идібізеенер. Хайди матап пөгінгезер, ідөк сіреніп идіңер. Ам хай син пир поларзар, анча пирібізіңер. ¹² Сірер пользарға күстенчетсер, пасказы чоғыл нинче пир поларзар. Худай сірердең пир полбасты кирексібинче, нинче пир полза, анказын пирзіннер тіп хынча. ¹³ Анзы сірге аар чуғып, пасхаларына, тізең, ниик ползын тіп нимес, че прайзына пір тиң полары үчүн иділче. ¹⁴ Сағам сірер пайзар, оларға польс поларзар. Соонаң олар, пай ползалар, сірге польс пирерлер. Андада прайзыни тиң пол парар. ¹⁵ Худай Пічиинде пазылғаны хоостыра полар: «көп чыып алған кізінің артых ниме полбаан, асхынах чыып алған кізінің читпес полбаан».

Тит паза аннаң хада тоғынчатханнар

¹⁶ Тит сірердеңер, мин чіли, тың сағыссырапчатханы үчүн, Худайыбысха алғыс ползын. ¹⁷ Мин аннаң сурынған полғамох, че, итсе-де, ол, күстенчіктеңер, сірерзер поэның көңнінең парған.

¹⁸ Аннаң хада піс, Чахсы Хабарны таратхан үчүн, прай тигіриблерде махтатчатхан харындазыбысты ысхабыс. ¹⁹ Аны тигіриблер, сыйыхтарыңны піснең хада апарзын тіп, таллааннар. Иди піс, Худайны саблап, сірернің полызар көңнінерні киречілеп, тоғынчабыс. ²⁰ Пу пай сыйыхтарны хайдар идерибістенер пір дее кизінін чіг сағыс сыхпазын тіп, сизінербіс. ²¹ Піс, Худайның на нимес, чонның даа алнында орта тудынарға күстенчебіс нооза. ²² Оларнаң хада харындазыбысты ызыбысхабыс. Аның полызарға тимдезі хайдағ даа киректе көп хати сыналған. Ол сірерге ізенерге чарирын пілче, аннаңар амды артых таа полызарға тимде. ²³ Титтенер чоохтаза, ол сірерге туза идіп тоғынчатхан минің арғызым полча. Пасха харындастарданар чоохтаза, олар тигіриблернің илчїлерї полчалар паза Христосха сабланыс ағылчалар. ²⁴ Оларға постарыңның хынызыңарны көзіт пирїнер. Прай тигіриблер аны көрзїннер, піс сірерге тиктең махтанмичатханыбысты пілзїннер.

Ах-арығ харындастарға сыйых пирерденер

9 Сїрерні ах-арығ харындастарға полыссыннар тіп, мағаа парзарға даа кирек чоғыл. ² Мин сїрернің полызарға күстенчїктерїңні пілчем паза анынаң македон кїзілерге махтанчам. Мин оларға Ахай чирїндегїлер сыйыхты пылтырох тимнеп салған полғаннар тіп чоохтаам. Сынында сїрернің полызарға тимделерїң көп кїзіні полызарға көөктїрген. ³ Минің сїрерні махтааным тик чоох пол парбазын тіп, харындастарны ысчам. Мин чоохтаан полғам: сыйыхтарны тимнеп салыңар. ⁴ Македон кїзілер миннең хада килїбїсселер, сїрер тимде полбин парзар, мин не нимес, сїрер дее уйатха кїрерзер. Андада піс тик ле махтан салған поларбыс. ⁵ Аннаңар харындастарыбысты, сїрерзер азынада парып, пирерге молчап салған сыйыхтарны азынадох тимнеп салзыннар тіп сурынғам. Андада ол тимнеен нїме хыза пасханға саналбас, сынынаң сыйых полар.

⁶ Ағаа хоза чоохтапчам: асхынах таараан кїзі идок алар, көп таарааны көбөк алар. ⁷ Полған на кїзі чүрее хоостыра пирзїн. Көңнї чарабин, ирїк чохтаң пирбезїн. Худай пар-чох көңнїнең пирчеткеннерге хынча нооза. ⁸ Худайның прай кирексїністерїңнї толдыр полар күзї пар. Аннаңар сїрернің прай нїме читкїче дее, кирексееннең көп тее полар. Ол ондайнаң сїрер, үлезїп ала, чахсы киректер идерзер. ⁹ «Прай нїмезїн үлеен, чоhtarға пир салған. Аның көөлбек көңнїн чон хақан даа пілер» тіп пазылых

нооза. ¹⁰Таарыпчатхан кізее Худай үрен дее, чиир халазын даа пирче. Олох ондайнан, Ол сіерге үлесчен ниме пирер паза аны көптелдірер. Андада пирерге тимделеріңнің тузазы пай полар. ¹¹Піс харанмин сыйыхтир үчүн, Худай пісті хачан даа пайыдар. Аның сылтаанда, көп кізі пістең алған сыйыхтары үчүн Аны алғыстир. ¹²Пу полызығ пирчең тоғыс ах-арығларның кирексіністерін не толдырбинча, че көп кізіде Худайға илбек алғыс төрітче. ¹³Итчеткен тоғыстарыңны көріп, сіерер үгретчеткен Христостың Чахсы Хабарының сөзінче полчатханнарың паза оларға даа, пасхаларына даа пар-чох көңнілеріңнен пирчеткеннерің үчүн, олар Худайны саблапчалар. ¹⁴Олар, прай чүректерінен сіерерзер тартылып, сіерердегі сині чох Худайның паарсазы үчүн алғыстап, пазырчалар. ¹⁵Худайның чоохтап таа полбас сыйыхтарының үчүн Ағаа алғыс ползын.

Павел позының тоғызына турысча

10 Мин, Павел, сіерернің араңарда полғанда, тідінмес, ырахтан, тізең, сіерерні хатығлаачы тіп тітірчеткен кізі, сіерерден сурынчам. Христос чіли, амырнаң паза чахсынаң сіерерге алданчам: ²сіерерзер килзем, мині хатығландыртпаңар. Мин хатығланысты пу чирдегілернің ондайынча чуртапчазар тіпчеткен кізілердең тоғыр айландыраңа сағынчам. ³Піс, пу чирде чөріп, пу чирдегілернің ондайынча күреспинчебіс нооза. ⁴Пістің күресчен тирігерібіс пу чирдегілерни осхас нимес. Че сивеелерні изепчеткен Худайның тирии пісте пар. Анынаң чабал сағыстарны, ⁵Худайны пілерге тоғыр полчатхан ноо даа көкеесімненісті аңдарчабыс. Ноо даа сағысты, кўснең алып алып, Христостың үлгүзіне кирчебіс. ⁶Хачан сіерер сөс истерге үгренип алзанаң, андада піс сөс испесті хатығлирға тимде турарбыс.

⁷Кізілерге көрчезер бе? Піреезі, позы Христостың кізізі полчатханын ікінчлебинчетсе, піс тее Христостың кізілері поларында аннаң халбинчатханыбысты сағысха алзын! ⁸Мағаа Хан-пиг пирген үлгүнең мин артых таа махтаныбысхан ползам, мағаа анзынаң уйадарға кирек чоғыл. Че ол үлгү сіерернің киртіністеріңні сайбирына нимес, пиктиріне пирілген. ⁹Сіерерні пічіктерінең хорыхтыраңа итчеткен кізі чіли көрінерім килбинче. ¹⁰Кем-де мині пічіктерімде хазыр паза кўстіг, позы килзе, тізең, чазығ, тик чоохтығ тіпче. ¹¹Ол кізі пілзін: піс пічіктерібісте, сөстерібісте хайдағбыс, сын киректе дее андағохпыс.

¹²Постарынаңар улуғлап чоохтапчатхан кізілер чіли, мин позымнаңар, чахсы кізібін тіп, сірерге чоохтанарға тідінмеспін. Олар, тізең, постарын постарынаң на тиннестірчелер, постарының синінең не синепчелер. Иди иткені алығ ниме! ¹³Піс Худай пирген нимедең пасха пір дее нименең махтанмаспыс. Худай пирген не үлүснең махтанарбыс. Ол үлүстің чардығы сірернің араңарда итчеткен пістің тоғызыбыс полча. ¹⁴Сірернің араңарда тоғынарын піске Худай пиргеннеңер, Христостанар Чахсы Хабарнаң сірерзер киліп, піс пирілгеннең артых ниме итпедібіс. ¹⁵Піс синінең артых махтанмаспыс. Піс кізі тоғызына даа махтанмаспыс. Че сірернің киртінізінеңер өс парыбысса, пістің тоғыста кирексіністерің дее өс парыбызар тіп ізенчебіс. ¹⁶Андада піс пасха чирлерзер Чахсы Хабарны чарлирға парарбыс паза пасхалары Худай пирген чирлерінде итчеткен тоғыстарға махтанмаспыс.

¹⁷Худай Пічиинде «Махтанчатхан кізі Худай иткен нименең махтанзын» тіп пазыл парған. ¹⁸Позын махтапчатхан кізі нимес, Худай махтапчатхан кізі турыстығ нооза.

Павел паза сын нимес илчілер

11 Мин тискінчеткен ползам, сірер көмес тее мағаа айирчыхсар. Итсе, айабохчазар чи. ²Мин сірерні Худайның күннезінең күннепчем. Мин сірерні пір ирге сөлеп салғам. Ам арығ чүректіг хысты Христосха пирібізерге итчем. ³Че Еваны чылан күйтігінең алчаахтырып алған чіли, сірернің дее сағыстарыңны піреезі сайбап салчаң полбазын тіп хорыхчам. Христосха постарыңны ачых-чарых паза арығ көңніліг чарыдарынаң хыйыс парчаң полбанар. ⁴Сірерзер піреезі киліп, піс үгретпеен Иисустанар үгретчетселер, пістен албаан хутты ағылчатсалар алай пірее пасха «чахсы хабарнаң» килчетселер, сірер оларны көңнілеріңе алчазар. ⁵Мин, тізең, иң артых илчілер тіп саналчатхан ол кізілердең пір дее кинек нимеспін тіп сағынчам. ⁶Тілге чітіг полбазам даа, че пілізім читпинче тіп полбассым. Сірер анзын постарың даа чахсы пілчезер.

⁷Мин, Худайның Чахсы Хабарын чарлапчатханда, сірердең пір дее ниме албаам. Мин, сірерні көдірер үчүн, позымны пазынчыхтаам. Анда минің пірее пыром пар ба? ⁸Сірернең тоғынар үчүн, мин пасха тигіриблердең улызығ алғам. Сірерде полганда, тізең, хызыхханда даа, сірердең пір дее ниме сурбаам.

⁹ Кирексеен нимені мағаа Македон чирінең килген харындас-тар пиргеннер. Мин сірернің мойнынарда одырбаам, хачан даа одырбаспын. ¹⁰ Христос киречі: мин сынны чоохтапчам! Ахай чирінде пу махтанызымны пілбеен кізі халбас. ¹¹ Мин ноға іди итчем? Сігерге хынминчатханнаар ба? Худай анзын пілче нооза!

¹² Мин ам итчеткен чіли итchedербін. Андада пу «илчїлернїн», піс итчеткен чіли итчелер тіп, махтанарға ондай чох полар. ¹³ Андағ сын нимес илчїлер чой тоғынчылар, Христостың илчїлері полаачыхтанчалар. ¹⁴ Мында пасхачыл ниме чоғыл: сайтан позы даа Чарыхтың ангелінің^с омазын алып алча. ¹⁵ Аннаар аның нымысчылары даа сынның нымысчыларына хубулчатханнарында пасхачыл ниме чоғыл. Че соонаң оларға иткен киректері хоостыра пирїлер.

Павелнїң ирееленїстерї

¹⁶ Пазох хатап сігерге чоохтапчам, міні алыға санабанар. Итсе, іди санапчатхан ползар, мағаа, алығ кізее, көмес махтаныбызарға чарадыңар ¹⁷ Мин чоохтир ниме Хан-пигнїң көннїне кїрбесчїк, че махтанчатсам, алығ кізі чїли чоохтанчам. ¹⁸ Пу чирде махтанар кибїр парда, мин дее махтаныбоғызим. ¹⁹ Хыйғазар, нооза. Аннаар алығ кїзіні сыдазарға сидїк полбас. ²⁰ Сїгернї пазынчатханнарға, сїгернї тонапчатханнарға, сїгерге үлгү салчатханнарға, сїгерге улугзырхапчатханнарға, наахтапчатханнарға тыстанчазар нооза. ²¹ Олар чїли поларға көннїм читпинчеткеннеңер, уйат мағаа. Че, пїреезі махтанарға тїдїнчетсе, мин дее, алығ кїзі, махтан поларчыхпын. ²² Олар еврейлер бе? Мин дее еврейбїн. Израильдеңнер бе? Мин дее аннаохпын. Авраамның^с төлі полчалар ба? Мин дее оларох осхаспын. ²³ Олар Христостың нымысчылары полчалар ба? Мин тискїнчеткен дее полим, че Христостың нымызын олардаң артых ла толдырчам тирчїкпїн. Мин олардаң көп тоғынғам, көп палығлатхам, харибде одырғам, көп хати өлер пазы полғам. ²⁴ Иудейлер^с міні пис хати отыс тоғызар сабысха чарғылааннар. ²⁵ Ёс хати сымыхнаң сохтыртханнар, пїр хати тастарнаң чаалатханнар. Мин ёс хати керїптїг саайға кїргем, пїр кўн, пїр хараа тирең талайнаң кўрескем. ²⁶ Мағаа чорыхтарымда хазыр суғлардан, тонағчылардаң, минїң чоным иудейлердең, пасха даа чоннардаң көп хорғыс полған. Саарларда даа, сөл чазыларда даа, талайларда даа, чой харындастардаң даа көп ирее көргем. ²⁷ Мин үзе тоғынчаңмын,

узубин даа, астап-сухсап таа чөрченмін, ораза^с тутчаңмын, со-
охха тооп, кисчең киби́м чох ирееленчеңмін. ²⁸ Ағаа хоза, күн-
нің-таңда пөкчең сурығлардаң пасха, мин прай тигіриблерденер
сағыссырапчам нооза. ²⁹ Күс хабын полбинчатхан кізілерденер
чүреем сыстапча, чазыхха кіргеннерденер чобалчам. ³⁰ Махта-
нарға кирек полза, читпес саримнаң махтанарбын. ³¹ Хачанға
даа саблығ Худай, Хан-пигібіс Иисустың Пабазы, минің тайма
ниме чоохтабинчатханымны пілче. ³² Дамаск саарында полға-
нымда, андағы Арета ханның пір устағчызы, мині тудып аларға
тіп, кізілерін саарның хаалхазын хадартхан. Че мині, саарның
ханазындағы көзенегінең торастығ түзірібізіп, аның холынаң
осхырғаннар.

Павелнің көспек көргені паза азых чооғы

12 Сағам мағаа, тузазы чох таа полза, махтанарға кирек. Ан-
нанар Хан-пигдең пирілген көспектерімнеңер паза азых
чоохтарымнаңар^с искір пирим. ² Мин Христосха киртінчеткен
пір кізіні пілчем. Ол он төртче чыл мының алнында (таң сын
позы, таң хутта полып – анзын Худай ла пілер) тигірниң иң
өөркі, үзінчі тамына сығарылған. ³ Ол кізіденер паза пір ниме
пілчем. Ол (Худай пілер, таң сын поэзы алай худы ба) ⁴ Худай са-
дынзар көдірілген. Анда ол кізі чоохтап таа полбас паза чоох-
тирға чарабас сөстерні искен. ⁵ Андағ кізінең мин махтанарбын.
Позымның нимеме махтанарбын? Читпестеріме ле. ⁶ Мин мах-
танарға иткен ползам, анзы алығ иткенім полбасчых. Сынны
чоохтирчыхпын нооза. Че піреелері миннең поэзымаң көрген-
нерінең алай искеннерінең артых сағынмазыннар тіп, махтан-
маспын. ⁷ Худай мағаа көп ниме азых чоохтаан. Анзына иртіре
махтанмас үчүн, Худай мағаа, идіме чымчылға хазаан чіли, мині
иреелезін тіп, сайтанның нымсчызын ысхан. ⁸ Аны хыйа идер-
ге Хан-пигдең үс хатап сурынғам. ⁹ Че Ол мағаа теен: «Сағаа
Минің паарсазым читкіче пирілче: күс-сағ чох кізіде Минің кү-
зім пары артых көрінче нооза». Аннаңар, мағаа Христостың күзі
артых кірзін тіп, күс-саам чоғына хынып махтанам. ¹⁰ Мин чит-
пестеріме, сөклеттіртчеткеніме, сидіксіністеріме, сүрдірчеткені-
ме, Христостың үчүн хыйыхтатчатханыма чөпсінчем. Күс-сағ
чох чөрчетсем, андада мин күстігбін, нооза.

Павелнің коринфтегілердеңер сағыссырааны

¹¹ Мин махтанып, изім сыхча. Че мині сірер іди полдырғазар. Мин, нимее чарабаан даа ползам, сірернің улуғ илчілеріңнен пір дее хомай нимеспін. ¹² Минің илчі полчатханымның киречі-лестерін – минің тыстанызымны, көп хайхастарны^с, танығлары, таңнастығ киректерні – сірер көргезер. Мин оларны сірернің аразында тыстанып иткем. ¹³ Пасха тигіриблерде пар нименің піреезі дее сірерде чох полған ма? Сірерге аар-чүк полып артылғаным сірерге читпин парған, арса? Мағаа пу пыроны тастирға сурынчам. ¹⁴ Ам үзінчізін сірерзер парарға итчем. Кізі мойнына артылбаспын. Мин сірердең пір дее ниме аларға итпинчем, сірерні постарыңны кирексіпчем. Палалары нимес, паба-іче палаларына анығ чыынарға киректер. ¹⁵ Сірер арачылан халар үчүн, мин сірерге позымны даа түгеде пир саларға тимдебін. Мин сірерге іди тың хынчатханымда, сірер ноға мағаа асхынах хынчатхан поларзар? ¹⁶ Хайдағ даа полза, мин сірерге, аар-чүк полып, артылбаам. Сірер, хынза, мині, көйткке санап, постарыңны алаахтырып, ахча алғам тирзер. ¹⁷ Мин сірерзер ысхан кізілернің пастыра пірее ниме сірердең алғам ма? ¹⁸ Мин Титті, алдап алып, пір харындаснаң хада сірерзер ызыбысхам. Ол, сірердең пірее ниме алып, тузланды ба? Піс анынаң пір көңніліг полбаабыс па? Пір чоллығ полбаабыс па?

¹⁹ Арса, піс сірернің алнынарда ахтанарға итчебіс тіп сағынчазар. Чох, Худай киречі, піс Христостың көңні хоостыра чоохтапчабыс. Хынғаннарым! Прай пу нимені піс сірернің киртіністеріңні пиктир үчүн чоохтапчабыс. ²⁰ Мин нимеден хорыхчам? Сірерзер килзем, минің көңніме кірбес кізілер пол парарларыңнан хорыхчам. Минің дее тудынғаным сірернің көңнілеріңе кірбин парчаң полбазын. Мин сірерге тоғассам, тартыстарны, істі чоxtанысты, өкпеленісті, посха ла хынғанын, сөклесчеткенін, чой чоохтар таратханын, көкеесімненісті, ай-пораан полчатханын көрерім килбинче. ²¹ Мин хатап килзем, Худайым, сірернің хайди полчатханнарынны көзідіп, мині уйатха сухчаң полбазын. Алында чазых иткен паза арығ нимес хылынған, чөреес, уйат пілбин тудынғаннарына Худайның алнында пыросынминчатхан кізілердеңер ылғирға киліс парчаң полбазын.

Үгезде чоохтааны паза алғыстастар

13 Мин сірерзер ам үзінчизін килербін. Худай Пічиинде чоох-талча: ноо даа сөске ікі-үс киречі табылза, ол сөс сынға саналча. ²Мин сірерде ікінчизін полғанымда, чазых итчеткен-нерге паза прай пасхаларына даа чоохтаан полғам, ам, сірернең хада ниместе, хатабох чоохтапчам: пазох килзем, сірерге айабаспын. ³Сірер Христос минің пастыра чоохтапчатханға киречілес киректепчезер бе? Христос сірерде тоғынчатса, Ол күзі чох нимес тіп, пілінер. Че Аның күзі сірернің аранарда көзіділер. ⁴Ол, кўс чох полып, кіреске^с хазатырт салған. Ам, тізең, Ол Худайның күзінең тіріг. Піс тее, Христос кўс чох полған чіли, кўс чохпыс. Че ам піс Аннаң хада чуртапчатханыбыста, поэыбыста Худайның күзі пар пол парды. Пу кўснен піс сірернің аранарда тузаланарбыс.

⁵Киртіністігзер бе тіп, постарыңны сынаңар. Постарыңны сыныхтаңар. Христос сірернің полғаныңарда чуртапча тіп чоохтап полбинчатсаңар, сірер сынағны ирт полбаанға килісче. ⁶Пістің пу сынаға турысханыбысты піліп аларзар тіп ізенчем. ⁷Сірерні пір дее чабал ниме итпезіннер тіп, Худайға пазырчабыс. Анзы сірернең махтанарға тіп нимес. Піс сірерденер саңай даа саба сағынчатхан ползабыс, піс сірерні чахсы итсіннер тіп хынчабыс. ⁸Піс сынға тоғыр пір дее ниме ит полбинчабыс. Піс итчеткен прай ниме сынның үчүн иділче. ⁹Сірер күстігзер піс, тізең, чазығыс. Піс анзына өрінчебіс. Піс, киртінізіңер толдыра ползын тіп, Худайға пазырчабыс. ¹⁰Мин ырахтаң мыны нимее сірерге пасчам? Сірерзер килзем, мағаа хатығланарға киліс парбазын тіп пасчам. Хан-пиг мағаа үлгүні киртінізіңерні сайбирға тіп нимес, че пиктирге пирген.

Павелнің анымчохтасханы

¹¹Че, харындастар, өрініңер, хыйғаларың хозыңар, часхарыныңар, пір сағыстың, амыр чуртаңар. Андада хыныс паза амыр пирчеткен Худай сірернең хада полар. ¹²Удур-төдір арығ чүректіг охсанызып, ізеннезіңер. Сірерге ах-арығлар прайзы ізен читірчелер. ¹³Хан-пигібіс Иисустың паарсазы, Худай Пабаның хынызы паза Худай Худынаң пірлескені сірернең хада ползын. Аминь.